

Najib Anggap Lawatan ke China Berhasil

Bernama

Jun 1, 2014

Oleh D.Arul Rajoo

BEIJING, 1 Jun (Bernama) -- Perdana Menteri Datuk Seri Najib Tun Razak menyifatkan lawatan rasmi enam hari beliau ke China kali ini amat berjaya, dan para pemimpin tertinggi China menganggap hubungan dengan Malaysia sebagai sesuatu yang 'istimewa'.

"Saya anggap lawatan rasmi saya ke China sempena sambutan ulang tahun ke-40 hubungan diplomatik Malaysia-China ini mendapat sambutan begitu menggalakkan sekali. Hasil lawatan saya anggap amat berjaya," katanya pada sidang media sebelum berlepas pulang ke Malaysia.

Najib berkata dalam pertemuan dengan Presiden Xi Jinping dan Perdana Menteri Li Keqiang, kedua-dua pemimpin utama negara itu menegaskan bahawa hubungan China dan Malaysia adalah amat penting, dan mereka menganggap ia sesuatu yang amat istimewa.

"Mereka beri keutamaan yang tinggi kepada hubungan antara China dan Malaysia," kata beliau.

Menurut Najib, dengan komitmen yang diberi dan kenyataan yang diluahkan kedua-dua pemimpin tersebut, beliau amat optimis dan yakin masa depan hubungan China dan Malaysia amat cerah sekali dan akan terus dapat dilonjakkan kepada tahap kejayaan yang lebih besar lagi.

Malah, kata beliau, layanan yang diberi amat mesra dan Li yang sepatutnya menghadiri satu majlis di luar Beijing, telah menjadual semula untuk hadir pada sambutan ulang tahun itu di Great Hall of People semalam yang merupakan hari cuti umum sempena Festival Perahu Naga.

Ditanya perasaan beliau apabila menghadiri majlis sambutan ulang tahun di tempat dan tarikh sama bapa beliau dan Perdana Menteri Malaysia kedua Tun Abdul Razak Hussein menandatangani perjanjian yang membolehkan hubungan diplomatik dijalin dengan China, Najib berkata beliau merasa begitu emosi sekali.

"Saya rasa begitu emosi atas dua perkara...satu signifikan majlis ini dibuat tempat sama 40 tahun dulu. Dan kedua sorotan kembali, lihat suasana di rantau ini ketika perang dingin, ancaman komunis di Malaysia ketika itu dan keadaan ramai yang sangsi dengan hubungan Malaysia-China," katanya.

Walaupun berdepan pelbagai halangan, Najib berkata beliau dapat membayangkan bagaimana sukarnya bagi Tun Razak untuk membuat keputusan ketika itu yang kini jelas sekali merupakan satu keputusan yang amat tepat.

"Apa yang dilakukan pemimpin dulu telah meletakkan asas yang kukuh. Hubungan ini mantap walaupun berlaku apa-apa masalah, termasuk isu MH370. Melihat 40 tahun akan datang, atas asas ini, hubungan ini akan membawa kemajuan lebih besar," katanya.

Dengan keyakinan tersebut, Kerajaan Malaysia akan mengambil langkah susulan untuk menjayakan semua ketetapan dan persefahaman yang telah dicapai, kata Najib, yang turut melawat bandar raya purba Xi'an sebelum datang ke ibu negara ini.

Bagi membolehkan tindakan yang lebih bertepatan dari segi masa dan keberkesannya, Najib berkata beliau telah mengambil keputusan untuk menubuhkan sebuah jawatankuasa khas.

Katanya jawatankuasa ini akan memantau dan mengambil semua tindakan lanjutan ataupun susulan yang perlu dilakukan pihak Malaysia supaya sebarang permasalahan, rintangan dan hambatan dapat diatasi dengan lebih tepat ataupun lebih pantas.

Najib berkata ia adalah sebuah jawatankuasa dalam kerajaan dan kementerian yang berkaitan akan dipelawa menyertainya tambahan pula hubungan dua hala telahpun dipertingkatkan.

"Ini melibatkan banyak kementerian dan mustahak bagi kita mengetahui apa yang dilakukan pihak yang satu lagi dan menyelaraskan semua tindakan yang perlu dengan segera supaya ada momentum baharu dalam hubungan dua hala antara Malaysia dan China," katanya.

Beliau berkata mesyuarat yang akan diadakan bukanlah mesyuarat berjadual, sebaliknya diadakan dari semasa ke semasa dan jika ada keperluan namun sekurang-kiranya dua kali dalam setahun.

Najib juga berkata walaupun kedua-dua negara mempunyai perbezaan pendapat

tentang beberapa isu, China menyatakan mereka amat menyenangi pendekatan dan cara Malaysia menanganinya, khususnya isu Laut China Selatan.

"Kita tak bersikap konfrontasi, kita pilih berbincang. Kita anggap isu sensitif dapat ditangani dengan rasional dan tenang, bukan cara yang sensitif.

Cara kita ambil masa tapi jelas bukan hambatan pada hubungan," katanya lagi.

Ditanya sama ada China ada meminta bantuan Malaysia untuk menjadi orang tengah dalam pertelagahan dengan Filipina dan Vietnam berhubung isu Laut China Selatan, Najib berkata mereka belum sampai ke tahap itu.

Katanya sebagai bakal Pengerusi Asean pada 2015, isu Laut China Selatan akan menjadi satu cabaran besar kepada Malaysia yang perlu mencari jalan penyelesaian dengan kaedah yang tidak membawa kepada ketegangan.

"Kita akan pilih cara rundingan dan perbincangan...pendekatan yang jamin keselamatan dan kestabilan di Laut China Selatan," katanya.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1042960>